

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 31, No. 1586

原始資料: 蕭鎮國大德提供, 維習安大德提供之高麗藏 CD 經文, 北美某大德提供, 西蓮淨苑提供新式標點

## No. 1586 [No. 1587; cf. No. 1585]

### 唯識三十論頌

世親菩薩造

大唐三藏法師玄奘奉 詔譯

護法等菩薩約此三十頌造《成唯識》，今略標所以。謂此三十頌中，初二十四行頌明唯識相；次一行頌明唯識性；後五行頌明唯識行位。就二十四行頌中，初一行半略辯唯識相；次二十二行半廣辯唯識相。謂外問言：「若唯有識，云何世間及諸聖教說有我法？」舉頌訓答，頌曰：

「1 由假說我法， 有種種相轉。

彼依識所變， 此能變唯三：

2 謂異熟、思量， 及了別境識。」

次二十二行半廣辯唯識相者，由前頌文略標三能變，今廣明三變相。且初能變其相云何？頌曰：

「初阿賴耶識， 異熟一切種，

3 不可知執受， 處了常與觸、  
作意、受、想、思， 相應唯捨受。

4 是無覆無記， 觸等亦如是，  
恒轉如瀑流， 阿羅漢位捨。」

已說初能變，第二能變其相云何？頌曰：

「5 次第二能變， 是識名末那，

依彼轉緣彼， 思量為性相。

6 四煩惱常俱， 謂我癡、我見、  
并我慢、我愛， 及餘觸等俱。

7 有覆無記攝， 隨所生所繫，  
阿羅漢滅定， 出世道無有。」

如是已說第二能變，第三能變其相云何？頌曰：

「8 次第三能變， 差別有六種，

了境為性相， 善不善俱非。

- 9 此心所遍行、 別境、善、煩惱、  
隨煩惱、不定， 皆三受相應。
- 10 初遍行觸等， 次別境謂欲、  
勝解、念、定、慧， 所緣事不同。
- 11 善謂信、慚、愧、 無貪等三根，  
勤、安、不放逸、 行捨及不害。
- 12 煩惱謂貪、瞋、 癡、慢、疑、惡見。  
隨煩惱謂忿、 恨、覆、惱、嫉、慳、
- 13 誑、諂與害、憍、 無慚及無愧、  
掉舉與昏沈、 不信并懈怠、
- 14 放逸及失念、 散亂、不正知。  
不定謂悔、眠， 尋、伺二各二。」

已說六識心所相應，云何應知現起分位？頌曰：

- 「15 依止根本識， 五識隨緣現，  
或俱或不俱， 如濤波依水。
- 16 意識常現起， 除生無想天，  
及無心二定， 睡眠與悶絕。」

已廣分別三能變相為自所變二分所依，云何應知依識所變假說我、法非別實有，由斯一切唯有識耶？頌曰：

- 「17 是諸識轉變， 分別、所分別，  
由此彼皆無， 故一切唯識。」

若唯有識，都無外緣，由何而生種種分別？頌曰：

- 「18 由一切種識， 如是如是變，  
以展轉力故， 彼彼分別生。」

雖有內識而無外緣，由何有情生死相續？頌曰：

- 「19 由諸業習氣、 二取習氣俱，  
前異熟既盡， 復生餘異熟。」

若唯有識，何故世尊處處經中說有三性？應知三性亦不離識，所以者何？頌曰：

- 「20 由彼彼遍計， 遍計種種物，  
此遍計所執， 自性無所有。
- 21 依他起自性， 分別緣所生。  
圓成實於彼， 常遠離前性。
- 22 故此與依他， 非異非不異，  
如無常等性， 非不見此彼。」

若有三性，如何世尊說一切法皆無自性？頌曰：

「23 即依此三性，立彼三無性，  
故佛密意說，一切法無性。  
24 初即相無性，次無自然性，  
後由遠離前，所執我、法性。  
25 此諸法勝義，亦即是真如，  
常如其性故，即唯識實性。」

後五行頌明唯識行位者，論曰：「如是所成唯識性、相，誰依幾位？如何悟入？」謂具大乘二種種性：一、本性種性，謂無始來依附本識，法爾所得無漏法因；二、謂習所成種性，謂聞法界等流法已，聞所成等熏習所成。具此二性方能悟入。何謂五位？一、資糧位，謂修大乘順解脫分，依識性、相能深信解。其相云何？頌曰：

「26 乃至未起識，求住唯識性，  
於二取隨眠，猶未能伏滅。」

二、加行位，謂修大乘順決擇分，在加行位能漸伏除所取、能取。其相云何？

「27 現前立少物，謂是唯識性，  
以有所得故，非實住唯識。」

三、通達位，謂諸菩薩所住見道，在通達位如實通達。其相云何？

「28 若時於所緣，智都無所得，  
爾時住唯識，離二取相故。」

四、修習位，謂諸菩薩所住修道，修習位中如實見理，數數修習。其相云何？

「29 無得不思議，是出世間智，  
捨二麤重故，便證得轉依。」

五、究竟位，謂住無上正等菩提，出障圓明，能盡未來化有情類。其相云何？

「30 此即無漏界，不思議善常，  
安樂解脫身，大牟尼名法。」

## 唯識三十論頌